

Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2019-imeersoq
(Aningaasaqarnermut Nunanilu Avannarlerni suleqatigiinnermut Naalakkersuisoq)

Saqqummiussissut

(Aningaasaqarnermut Nunanilu Avannarlerni suleqatigiinnermut Naalakkersuisoq)

Siullermeerinninneq

Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisissaattut siunnersuut Naalakkersuisut sinnerlugit matumuuna saqqummiuppara.

Siunnersuut aningaasarsianit akileraarutit pillugit inatsimmi atuuttumi allannguutissanik arlalinnik imaqarpoq.

Partiit 2019-imi aningaasanut inatsit pillugu isumaqatigiissusiortut suliffeqarnermi ilanngaammik atuutsitsilernissap sulissutigineqarnissaa kissaatigaat. Aammattaaq siunertamut tamatumunnga 2021-mit aallartittumik aningaasaqarnikkut tunngavigisassanik ukiumoortumik 50 mio. kr.-nik aningaasanut inatsimmi immikkoortitsisoqarnissaa partiinit isumaqatigiissutigineqarpoq. Suliffeqarnermi ilanngaatip siunertaraa suliffeqarnissap kajuminnarnerulernissaa, pingaartumik appasissumik akunnattumillu isertitaqartartut eqqarsaatigalugit. Tamanna ilaatigut pissaaq sunniuteqartumik akileraarusersuisarnermi katitigaasumi unammilligassat annikillisinnerisigut.

Taamaalilluni siunnersuut una inatsisissamik piareersaalluni suliap partiinit 2019-imi aningaasanut inatsit pillugu isumaqatigiissummi aallartinneqartup inerneraa.

Suliffeqarnermi ilanngaatip nassatarisaanik inuit tamarmik ilanngaaserneqassapput, taanna inuup sulinermi isertitai tunngavigalugit naatsorsorneqartassalluni. Ilanngaat suliffeqarnermi isertitat amerliartornerat ilutigalugu qaffiakkiartussaaq. Suliffeqarnermi ilanngaatip qaffasinnerpaaffissaa ukiumut 9.800 kr.-uvoq. Tamannalu pineqartup akileraarutigisassaasa ataatsimut annertussusiat apeqqutaatillugit isertitat atorneqarsinnaasut 4.214 kr.-nik amerlinerannik nassataqassaaq.

Suliffeqarnermi ilanngaat isertitanut 386.000 kr.-t sinnerlugit amerlassusilinnut atatillugu annikillisikkiartuaarneqartassasoq siunnersutigineqarpoq. Annikillisitsiartuaarnerup nassatarisaanik ilanngaat pingaartumik appasissumik akunnattumillu isertitalinnut ilaqaataassaaq aammalu aningaasatigut tunngavissarisat immikkoortinneqartut iluaniitinneqassalluni. Aamma appasissumik akunnattumillu isertitaqartartut sunniuteqartumik akileraarusersuisarnermi katitigaasumi unammilligassanik sunnerneqarnerussapput,

tamatamani isertitat amerleriarnarat ilutigalugu pisortanit ikiorsiissutit, soorlu ineqarnermut tapiissutit ikileriaateqassammata.

Siunnersuutip kingunerisassaannik naliliinermi tunngavigineqarput ukiumi isertitaqarfiusumit 2016-2017-imit paasissutissat. Paatsoortoqaqqunagu oqaatigissavara 2018-imi isertitanit kisitsisit siunnersuutip aningaasaqarnikkut kingunerisassaannik naliliissutinik allannguissamut tunngavissiissappata Inatsisartut tamanna pillugu Naalakkersuisunit allakkatigut paasitineqassammata.

Tamatuma saniatigut aningaaserivinni pensionisiassanut ileqqaarutinut maleruagassat allannguuteqartinneqarnissat siunnersuutigineqarpoq.

Inuit ataasiakkaat ileqqaarutaannik mianerinninnissaq aammalu pensionisiassanut aaqquissuussinerni aningaasat naapertuuttumik aqunneqarnissat inuiaqatigiinnit soqutigineqarnera eqqarsaatigalugu innuttaasup aningaasalersuinissamut tunisassiani sorlerni pensionisiassaminik ileqqaarutissanik inissiisinaanera pillugu maleruagassanik siusinnerusukkut atuutsitsisoqalerpoq.

Aningaaserivinnit oqaatigineqarpoq maanna killilersuutit ima kinguneqarsinnaasut innuttaasut pensionisiassanut ileqqaarutiminnit pissarsiassat ikinnerulersinnaallutik. Taamaattumillu pensionisiassanik ileqqaagallit, aningaaseriviit inuiaqatigiillu soqutigisaat eqqumaffigalugit maleruagassanik pitsaanagerusunik pisariaqartitsisoqarpoq. Siunnersuut aningaaseriviit immikkoortukkuutaanik periarfissanik neqerooruteqarsinnaanerannik periarfissiivoq. Taamaalilluni pensionisiassanut ileqqaakkat aningaasalersuiffissamut ataatsimut arlalinnuunniit isumatusaartumik ajutoorfigisinnaasanullu qulakkeerinnittumik inissinneqarsinnaassapput.

Taama oqaaseqarlunga siunnersuut Inatsisartunut oqaluuserisassanngortippara.